



1001 Masalah

Abu Al-Mokhtar Sedia Menjawab..

Ibrahim 'Ārafi Abu Bakar, Kampung Pendek, Kelantan

bertanya:

Apakah hukumnya loteri disegi agama Islam

sejati? Dan adakah menjadi kebijakan atau kejahanan

kepada seseorang yang selalu membeli tiket loteri?

Jawab: Mengenai hukum loteri ini telah pernah

dijawab dengan panjang di dalam ruangan ini dengan keterangan-keterangan

yang jelas yang menunjukkan bahawa mengadakan loteri dan

membeli loteri itu ditegah. Tiap-tiap tegahan Tuhan itu

tentu buruknya banyak dan tidak payah dipersoalkan.

Diharap saudara perhatikan jawapan-jawapan kita yang telah

lalu mengenai ini.

Adapun mengenai mendapat bahagian daripada wang

loteri masyarakat seperti yang ada sekarang yakni bahagian-bahagian

daripada hasil loteri itu, sebagaimana telah pernah kita

perkatakan ialah harus diambil untuk menguatkan

perdirian¹ kita.

* * *

Ali bin Yusuf Guru Besar Sekolah Umum

Belara Terengganu bertanya:

“Saya berasa benar-benar suka mengetahui dengan

sedalam-dalamnya mana yang benar dan mana yang salah, iaitu nampaknya

pada masa sekarang selalu saya dengar dan saya dapati

terbit bermacam-macam perbalahan di antara alim-alim ulama dalam

satu-satu masalah agama Islam, kerana masing-masing mengeluarkan

pendapatnya yang berlainan antara dua pihak dalam masalah itu. Sepihak berdasarkan kepada fahaman alim ulama yang dahulu-dahulu serta mazhab-mazhab khasnya mazhab Shāfi'i dan sedikit-sedikit sahaja berdasarkan kepada al-Hadīth dan al-Qur'an, tetapi yang sepihak lagi tidak sedikitpun berdasarkan kepada yang lain-lain melainkan semata-mata berdasarkan kepada al-Hadīth dan al-Qur'an. Maka daripada keterangan-keterangan di atas itu diharapkan tuan terangkan hukumnya:

1. Mengapakah boleh jadi perbalahan sedemikian antara dua pihak, pada hal mereka sama-sama mengetahui isi-isi dan tujuan-tujuan Hadīth dan Qur'an?

2. Apakah hukumnya hak seseorang alim ulama yang memberi fatwa dalam hal agama Islam yang tidak berdasarkan kepada Hadīth dan Qur'an semata-mata iaitu ada tempatnya berlawanan dengan Hadīth dan Qur'an?

Jawab: Selama menjawab pertanyaan ini maka patutlah disebut di sini bahawa imam-imam Mazhab sentiasa memperingatkan, sebagai sifat mereka seorang manusia yang mungkin ada khilafnya, mengatakan bahawa jika pendapat mereka bersalahan dengan kitab Allāh dan sunah Rasul-Nya (S.A.W) maka tinggalkanlah pendapat mereka dan ambillah kitab Allāh dan sunah Rasul-Nya (S.A.W) itu.

1) Adapun sebabnya terbit perbalahan (berlain-lainan pendapat) itu kebanyakannya di dalam memahamkan maksud-maksudnya Hadīth atau al-Qur'an yang tidak jelas. Masing-masing mereka memberi pendapat berdasarkan kepada al-Qur'an dan Hadīth itu yang tidak jelas menerangkan sesuatu. Lazimnya kalau tidak terang di dalam al-Qur'an ada dijelaskan oleh al-Hadīth

¹ pendirian

dan jika tidak ada keterangan dari al-Hadīth maka akan didapati daripada *ijmā'* sahabat – dan *qiyyas* di dalam perkara ibadah tidak ada – hanya yang boleh *dīqiyaskan* ialah atas perkara-perkara yang pada masa Nabi tidak terjadi maka tatkala menghukumnya hendaklah diambil *qiyyas* keadaan itu kepada keadaan-keadaan masa Nabi dahulu.

- 2) Tiap-tiap hukum hendaklah didasarkan dengan al-Qur'ān dan al-Hadīth dan jika ia menghukum dengan hukum yang berlawanan dengan al-Qur'ān dan al-Hadīth maka ia berdosa.
- 3) Yang wajib diikut ialah hukum-hukum yang berdasarkan kepada al-Qur'ān dan al-Hadīth, kerana di sanalah muktamad hukum-hukum itu.

* * *

Abdul Ghafur (Ikhwan 1324) Parit Baharu, Perak, bertanya:

- 1) Bagaimana jika kami menghantarkan pertanyaan kepada Abu al-Mukhtār alamatnya?
- 2) Bolehkah kami minta ganti *badge* Ikhwan kami yang hilang?
- 3) Apakah syaratnya jika kami masuki gambar dalam majalah Qalam?

Jawab: 1) Alamatkan kepada: Abu al-Mukhtār,

Qalam, 358 Geylang Road, Singapura.

2) Boleh – Syaratnya membayar 30 sen disertakan pula 10 sen setem.

4) Hantarkan gambar saudara dengan teman-teman kepada majalah Qalam – Inshā' Allāh akan dimasukkan jika difirkannya bermanfaat.

* * *

Salahudin Haji Abdullah Burmin, Jambu, Pattani, Thailand, bertanya:

Apa dia hak berjiran di dalam Islam. "Soalan ini saya datangkan kerana saya memandang keadaan masyarakat Islam di Patani sangat-sangat menyediakan terutamanya di kampung saya. Diharap tuan menerangkan hukumnya menurut pandangan *shara'*."

Jawab: Di dalam surah Al-Nisā' ayat 36 ada menyebut maksudnya: "Dan sembahlah olehmu akan Allah, janganlah kamu menyengutukannya dengan sesuatu, dan berbuat ihsanlah kepada dua ibu bapa dan kerabat, kepada anak-anak orang-orang miskin, kepada jiran yang mempunyai keberatan, kepada jiran yang jauh, kepada isteri, kepada *ibn al-sabīl*, dan kepada hamba-hamba sahaya yang kamu miliki, bahwasanya Allah tidak menyukai orang yang sompong lagi memegahkan diri."

Sabda-sabda Nabi (S.A.W) maksudnya: "Barang siapa mengaku beriman akan Allah dan hari kemudian maka janganlah ia menyakiti jirannya, dan barang siapa mengaku beriman akan Allāh dan hari kesudahan maka hendaklah ia tetap mengatakan kebaikan, atau hendaklah ia berdiam diri. (Hadis Riwayat Bukhārī).

"Barang siapa yang mengaku beriman akan Allah dan hari kesudahan, maka hendaklah ia tetap mengatakan kebaikan, atau hendaklah ia berdiam diri, dan barang siapa mengaku beriman akan Allāh dan hari kesudahan, maka hendaklah ia tetap memuliakan jirannya, dan barang siapa mengaku beriman akan Allah dan hari kemudian maka hendaklah ia tetap memuliakan *dayyifnya* (tetamu)." (Maksud Hadis Riwayat Bukhārī dan Muslim).

"Orang-orang mukmin itu ialah orang yang dipercayai oleh manusia, orang Muslim itu ialah orang yang sejahtera manusia dari lidahnya dan tangannya, orang-orang *Muhajir* itu ialah orang yang meninggalkan kejahatan.

Demi Tuhan yang diriku di tangan-Nya, tidak akan masuk syurga seorang hamba yang tidak terpelihara jiran-jirannya dari keburukan-keburukannya. (Maksud Riwayat Abu Ya'lā).

Daripada satu ayat al-Qur'an (dan ada lain-lain ayat lagi) serta tiga hadis yang kita letakkan di atas ini adalah menunjukkan bagaimana perintah-perintah disuruh kita berbuat baik kepada jiran-jiran kita. Kita ditegah dengan jelas daripada mengganggunya.

Adapun orang yang termasuk menjadi jiran itu ialah orang-orang yang berhampiran tempatnya dengan kita termasuk ke dalamnya jiran-jiran kita orang-orang Islam, atau kafir, atau hamba, atau fasik, teman, seteru, atau anak negeri, orang dagang, baik kerabat atau pun bukan, baik dekat rumahnya atau pun jauh.

Jiran itu ada pula peringkat-peringkatnya. Mereka ada yang mempunyai satu hak (hak jiran sahaja) iaitu jiran yang *mushrik*, dan ada pula yang mempunyai dua hak iaitu hak jiran dan hak Islam, dan ada pula yang mempunyai tiga hak iaitu hak-hak jiran, Islam dan kerabat.

Kepada mereka itu hendaklah diberi *ihsān* iaitu menyampaikan rupa-rupa kebaikan menurut kesanggupan, seperti memberi hadiah, memberi salam, menjernihkan muka tatkala berjumpa, memeriksa (mempelajari) keadaannya, memberi pertolongan semangat dan kebendaan di mana-mana ia berhajat, tiada mengganggu dan menyakitinya dan lain-lain seumpamanya.

Islam sangat membesarkan hak-hak jiran dan Islam memandang bahawa mengkhianati jiran menjadi salah satu dosa besar. Kita hendaklah membuat kebaikan dan kebahagiaan kepadanya, member pertunjuk dan pengajaran yang baik kepadanya, mendoakannya dengan hati, lidah dan

anggotanya – dengan bersungguh-sungguh. Kalau ia kematian maka kewajipan kita menolongnya, demikian juga kalau ia susah diwajibkan kita mengurangkan tanggungan kesusahannya daya dan upaya kita.

Menjawab suatu pertanyaan seseorang terhadap kepada kewajipan kepada jirannya Rasulullah (S.A.W) bersabda: "Jika ia (jiranmu) meminta sesuatu kepadamu, tolonglah akan dia; jika ia sakit, jika ia fakir bantuilah akan dia; jika ia mendapat kejabjikan ucapan selamat (tahniah) kepadanya; jika ia ditimpa bencana, senangkanlah hatinya, apabila ia mati (meninggal) iringilah jenazahnya, dan tiada engkau meninggikan rumah kamu atasnya yang mendindingnya dari angin melainkan dengan keredaannya, dan janganlah engkau menyakitinya dengan bau periuk engkau, hanya jika engkau memberi sedikit kepadanya. Dan jika kamu membeli (buah-buahan itu ke rumah) dengan bersembuni-sembuni dan janganlah anak-anakmu membawa buah-buahan itu keluar untuk memanaskan hati anak jiranmu itu."

(Maksud Hadis Riwayat *al-Tabrī*)

Abdullah bin Amru, apabila disembelihkan untuknya seekor kambing, beliau menyuruh supaya diberikan sedikit dari daging itu kepada jirannya Yahudi.

Seterusnya Nabi (S.A.W) berkata (maksudnya): "Janganlah memandang rendah seorang jiran untuk jirannya dengan sebesar tapak kambing." (Hadis Riwayat Bukhārī).

Bagaimana besarnya hak jiran itu dapatlah disimpulkan dari sabda Nabi (S.A.W) yang maksudnya: Jibril sentiasa memesan kepada aku tentang hal jiran, hingga aku menyangka bahwasanya Jibril akan menetapkan wajib pusaka bagi jiran itu."

Berbuat baiklah di antara kita berjiran dan buatlah suka bermaaf-maafan jika ada terbit kesalahan kita atau daripada anak-anak kita.